

Titah Ucapan
Tuanku Canselor
UPM Sultan
Sharafuddin
Idris Shah Ibni Al
Marhum Sultan
Salahuddin Abdul
Aziz Shah Al-Haj



UPM terus pacu kemajuan negara

Oleh Mona Ahmad
mona@bharian.com.my

"**S**ETINGGI-tinggi tahniah kepada 7,846 graduan atas kejayaan menerima ijazah dan diploma masing-masing. Kejayaan yang bermakna dalam sejarah peribadi hidup anda sekalian. Memperoleh segulung ijazah adalah impian semua, tetapi tidak semua orang berupaya mencapai impian itu.

Penghargaan dan ucapan tahniah Beta zahirkan kepada ibu bapa dan pensyarah yang berjaya mendidik dan membimbing graduan sehingga berjaya.

Kejayaan hari ini Beta kira sangat signifikan dengan pengorbanan ibu bapa dan keluarga. Jerih payah mereka, terutama ibu bapa menyekolahkan anak-anak tiada tolok bandingnya, malah ada di kalangan mereka yang terpaksa mengikat perut demi impian ini.

Begitu juga dengan pensyarah yang mendidik anda sehingga melepasi tahap

keperluan bagi pengurniaan ijazah. Sehubungan itu, Beta mengingatkan graduan supaya menginsafi pengorbanan ini dan tidak melupakan mereka yang banyak berjasa.

Sehingga kini, UPM berjaya melahirkan 127,689 graduan sejak konvokesyen pertamanya. Ramai tokoh terkemuka negara lahir dari universiti ini. Nama seperti Tan Sri Basir Ismail, Tan Sri Dr Arshad Ayub, Tan Sri Dr Ani Arope, Prof Emeritus Tan Sri Dr Rashdan Baba, Tan Sri Dr Nayan Ariffin dan ramai lagi sudah memenangi bibliografi tokoh utama negara dalam bidang diceburi. Golongan ini menjadi alumni yang sekian lama mengharumkan nama universiti.

Setiap kali konvokesyen, kita sebenarnya merayakan kejayaan melahirkan graduan untuk memulakan persaingannya mereka di pasaran kerjaya. UPM berusaha untuk merealisasikan hasrat dalam menyediakan modal insan kelas pertama sebagai pesaing global yang lebih kompetitif di pentas antarabangsa menerusi pemantapan aktiviti kurikulum

dan kokurikulum.

Penggunaan teknologi dalam pendidikan di UPM begitu luas sehingga universiti ini muncul sebagai komuniti pengguna ICT terbesar di Malaysia dan keempat di Asia dari kalangan institusi pengajian tinggi.

Beta optimis dengan keupayaan UPM untuk terus menjadi institusi penting sebagai pemacu kemajuan negara.

Sebagai sebuah universiti pelbagai disiplin yang banyak menghasilkan kajian, kekayaan ilmiah dan penyelidikan universiti seharusnya dikongsi bersama dengan masyarakat.

Sebagai contoh, isu pemanasan global dan kesan kenaikan minyak, universiti perlu segera mencari penyelesaian untuk membawa masyarakat keluar dari belenggu itu.

Beta ingin melihat sumbangan UPM memberi impak kepada masyarakat global dan relevan untuk agenda pembangunan negara seperti isu pembangunan produk halal. Institut Penyelidikan Produk Halal UPM yang ditubuhkan pada 1 Julai 2006 memberi sumbangan besar dalam menjadikan Malaysia sebagai hab yang bertaraf dunia.

Keputusan untuk menjadi 'Pemimpin Dunia dalam Pertanian Tropika Baru' adalah tepat dengan membangunkan bersama bidang pertanian, perubatan, kejuruteraan, perhutanan dan pemakanan menerusi konsep berkenaan. Graduan amat dinantikan

masyarakat untuk kembali kepada mereka dan memakmurkan ketamadunan bangsa. Khazanah ilmu di universiti ini bukan untuk disimpan tetapi perlu diamalkan demi kemajuan bangsa dan negara.

Bagi memastikan kehidupan anda bernilai dan nama UPM terus harum, maka graduan perlu bijak meneroka peluang dalam apa juga bidang, bijak berfikir, berjiwa rakyat dan aktif dalam aktiviti sukarela, patriotik dan mempunyai jati diri serta memiliki personaliti unggul.

Budaya alumni seharusnya berkisar sekitar kesediaan alumni untuk menyumbang, memperkukuh dan memperkasa universiti ini.

Seharusnya, apabila bergelar alumni, graduan bangga dan sentiasa terpanggil untuk kembali ke bumi Serdang untuk memberi sumbangan dan sokongan berterusan kepada universiti ini.

Beta berharap Alumni UPM akan mencontohi budaya alumni institusi pengajian terbilang dunia seperti Universiti Havard yang mempunyai dana endowmen sebanyak AS\$30 bilion, hasil sumbangan graduan dan alumni universiti itu. Kebanggaan mereka terhadap universiti yang berusia 375 tahun itu menakjubkan dan wajar dicontohi.

Beta berharap UPM terus gemilang di bawah kepimpinan Prof Datuk Dr Nik Mustapha Raja Abdullah selaku Naib Canselor universiti itu".

“Beta optimis dengan keupayaan UPM untuk terus menjadi institusi penting sebagai pemacu kemajuan negara”

- Sultan Sharafuddin Idris Shah
Canselor UPM